

Spescha ha il curaschi da malegiar cun fleters

In exposiziun bunamain tradiziunala cun surpraisas

■ (anr/vi) L'exposiziun da l'artist **Luzian Spescha** en la galleria Frankengasse ha prest tradiziun. A la vernissascha da la sonda passada hai dà art, musica e buna cumpagnia. Dumengia proxima ha lieu in ulteriur event. Già per la tschintgavla giada avra la galleria turitgaisa sias portas per in' exposiziun da l'artist sursilvan. Igl è usit ch' ils dus chantauturs *Marcus Hobbi* ed *Alexi Nay* èn preschents a la vernissascha. «Els chantan las chanzuns che stattan a cor a mi», ha Spescha ditg a l'entschatta da la vernissascha. La galleria era bain plaina. Bliers interessents d'art, ma era in'entira rotscha Rumantschs ed amis da l'artist han procurà per in'atmosfera festiva.

Curaschi da duvrar fleter

Per il solit malegia *Luzian Spescha* cun colurs d'ieli. Ina surpraisa muntan perquai in'entira partida maletgs ch'èn dissegnads cun colurs da fleter che l'artist mussa questa giada en l'exposiziun. Prejudizis, che fleters sajan be in med colurar per uffants, svaneschan svelto, sch'ins contempla ils pitschens dissegns exponids.

Era en ils maletgs da fleter ves'ins immediat las furmas u ils motifs tipics per Spescha. Ma las colurs gaglias, las qualas l'artist dovra a moda spargnusa, glischan



In bun team: L'artist Luzian Spescha ed Erica Gubler che maina la galleria Frankengasse.

en ils maletgs da fleter pli fitg ch'èn quel dad ieli.

Culms e cuntradas

La galleria è partida en duas stanzas. En ina stanza chattan ins ina seria da culms. Ils bliers maletgs varieschan en tuns blaus. I n'è betg culms reals ch'èn malegiads cun ieli sin palpieri, mintgatant sa schluitan ils culms da Spescha bunamain en l'abstracziun. Ma la forza e stattaivladad ch'ils culms espriman è tuttavia cumparegliabla cun quella da pizs e muntognas reals.

La segunda stanza mussa la vart plitost geometrica u architectonica dal pictur. Qua regordan las furmas savens a cuntradas u a citads orientalas.

Texts franzos tar maletgs

L'exposiziun va fin ils 16 da settember. Dumengia proxima, ils 3 da settember a las 11.00, envida la galleria Frankengasse ad in aperitiv. Cun questa chaschun datti in'ulteriura surpraisa: L'autur franzos *Jean Gelbseiden* vegn a preleger texts ch'el ha scrit aposta tar ils novs maletgs da Spescha.

Plinavant vegn puspè purschì musica: ghitara e chant cun *Herbert Amplatz* e *Daniele Fumagalli*.